

四庫全書

經部

欽定四庫全書

經部

左傳杜林合注

原序
卷二

詳校官監察御史_臣祝德麟

給事中_臣溫常綬覆勘

總校官編修_臣王燕緒

校對官員外_臣張慎和

謄錄監生_臣江右端

欽定四庫全書

經部五

左傳杜林合注

春秋類

提要

臣等謹案左傳杜林合注五十卷明王道焜
趙如源同編案朱彝尊經義考載宋林堯叟
春秋左傳句解四十卷引鄭珣之言曰堯叟
字唐翁崇禎中杭州書坊取其書合杜注行
之又載此書五十卷引陸元輔之言曰王道

焜杭州人中天啟辛酉鄉試與里人趙如源
濬之共輯此書云云今書肆所行卷數與彙
尊所記合而削去道焜如源之名又首載凡
例題為堯叟所述而中引永樂春秋大全殆
足哈喙蓋即以二人編書之凡例改題堯叟
也杜預注左氏號為精密雖隋劉炫已有所
規元趙汭明邵寶傳遊陸梁

國朝顧炎武惠棟又遞有所補正而宏綱巨目

終越諸家堯叟之書徒以箋釋文句為事實
非其匹第古注簡奧或有所不盡詳堯叟補
苴其義使淺顯易明于讀者亦不無所益且
不似朱申句解于傳文橫肆刊削故仍錄存
之以備一解中附陸德明音義當亦道焜等
所加原本所有今亦並存焉乾隆四十六年
十二月恭校上

總纂官

臣紀昀
臣陸錫熊

臣孫士毅

總校官臣陸費墀

欽定四庫全書

春秋左傳原序

春秋者魯史記之名也記事者以事繫日以日繫月以月繫時以時繫年所以紀遠近別同異也故史之所記必表年以首事年有四時故錯舉以為所記之名也周禮有史官掌邦國四方之事達四方之志諸侯亦各有國史大事書之於策小事簡牘而已孟子曰楚謂之檮杌晉謂之乘而魯謂之春秋其實一也韓宣子適魯見

易象與魯春秋曰周禮盡在魯矣吾乃今知周公之德與周之所以王韓子所見蓋周之舊典禮經也周德既衰官失其守上之人不能使春秋昭明赴告策書諸所記註多違舊章仲尼因魯史策書成文考其真偽而志其典禮上以遵周公之遺制下以明將來之法其教之所存文之所害則刊而正之以示勸戒其餘則皆即用舊史史有文質辭有詳畧不必改也故傳曰其善志又曰非聖人孰能修之蓋周公之志仲尼從而明之左丘

明受經於仲尼以為經者不刊之書也故傳或先經以
始事或後經以終義或依經以辦理或錯經以合異隨
例而發其例之所重舊史遺文畧不盡舉非聖人所修
之要故也身為國史躬覽載籍必廣記而備言之其文
緩其旨遠將令學者原始要終尋其枝葉究其所窮優
而柔之使自求之饜而飫之使自趨之若江海之浸膏
澤之潤渙然冰釋怡然理順然後為得也其發凡以言
例皆經國之常制周公之垂法史書之舊章仲尼從而

修之以成一經之通體其微顯闡幽裁成義類者皆據舊例而發義指行事以正褒貶諸稱書不書先書故書不言不稱書曰之類皆所以起新舊發大義謂之變例然亦有史所不書即以為義者此蓋春秋新意故傳不言凡曲而暢之也其經無義例因行事而言則傳直言其歸趣而已非例也故發傳之體有三而為例之情有五
一曰微而顯文見於此起義在彼稱族尊君命舍族尊夫人梁亡城緣陵之類是也二曰志而晦約言示制

推以知例參會不地與謀曰及之類是也三曰婉而成章曲從義訓以示大順諸所諱辟壁假許田之類是也四曰盡而不汙直書其事具文見意丹楹刻桷天王求車齊侯獻捷之類是也五曰懲惡而勸善求名而亡欲蓋而章書齊豹盜三叛人名之類是也推此五體以尋經傳觸類而長之附于二百四十二年行事王道之正人倫之紀備矣或曰春秋以錯文見義若如所論則經當有事同文異而無其義也先儒所傳皆不其然答曰

春秋雖以一字為褒貶然皆須數句以成言非如八卦之爻可錯綜為六十四也固當依傳以為斷古今言左氏春秋者多矣今其遺文可見者十數家大體轉相祖述進不得為錯綜經文以盡其變退不守丘明之傳於丘明之傳有所不通皆沒而不說而更膚引公羊穀梁適足自亂預今所以為異專修丘明之傳以釋經經之條貫必出於傳傳之義例總歸諸凡推變例以正褒貶簡二傳而去異端蓋丘明之志也其有疑錯則備論而

闕之以俟後賢然劉子駿創通大義賈景伯父子許惠卿皆先儒之美者也未有穎子嚴者雖淺近亦復名家故持舉劉賈許穎之違以見同異分經之年與傳之年相附比其義類各隨而解之名曰經傳集解又別集諸例及地名譜第歷數相與為部凡四十部十五卷皆顯其異同從而釋之名曰釋例將令學者觀其所聚異同之說釋例詳之也或曰春秋之作左傳及穀梁無明文說者以為仲尼自衛及魯修春秋立素王丘明為素臣

言公羊者亦云黜周而王魯危行言孫以辟當時之害
故微其文隱其義公羊經止獲麟而左氏經終孔丘卒
敢問所安答曰異乎余所聞仲尼曰文王既没文不在
茲乎此制作之本意也歎曰鳳鳥不至河不出圖吾已
矣夫蓋傷時王之政也麟鳳五靈王者之嘉瑞也今麟
出非其時虛其應而失其歸此聖人所以為感也絕筆
於獲麟之一句者所感而起固所以為終也曰然則春
秋何始於魯隱公答曰周平王東周之始王也隱公讓

國之賢君也考乎其時則相接言乎其位則列國本乎其始則周公之祚胤也若平王能祈天永命紹開中興隱公能弘宣祖業光啟王室則西周之美可尋文武之迹不隊是故因其歷數附于行事采周之舊以會成王義垂法將來所書之王即平王也所用之歷即周正也所稱之公即魯隱也安在其黜周而王魯乎子曰如有用我者吾其為東周乎此其義也若夫制作之文所以彰往考來情見乎辭言高則旨遠辭約則意微此理之常

非隱之也聖人包周身之防既作之後方復隱諱以辟
患非所聞也子路欲使門人為臣孔子以為欺天而云
仲尼素王丘明素臣又非通論也先儒以為制作三年
文成致麟既已妖妄又引經以至仲尼卒亦又近誣據
公羊經止獲麟而左氏小邾射不在三叛之數故余以
為感麟而作作起獲麟則文止於所起為得其實至於
反袂拭面稱吾道窮亦無取焉

春秋提要

周十二王

春秋歷十有四年
悼王立未踰
年敬王崩在春秋後
故止曰十

二王

平王

四十九年入春秋
隱元年也
三年崩在位五十七年

桓王

元年隱四年也
桓十五年
年崩在位二十三年

莊王

元年桓十六年也
莊十五年
二年崩在位十五年

僖王

元年莊十二年也
僖十五年
七年崩在位五年

惠王

元年莊十八年也
僖二十五年
年崩在位二十五年

襄王

元年僖九年也文八年崩在位三十三年

頃王

元年文九年也十四年崩在位六年

匡王

元年文十五年也宣二年崩在位六年

定王

元年宣三年也成五年崩在位二十一年

簡王

元年成六年也襄元年崩在位十四年

靈王

元年襄二年也二十八年崩在位二十七年

景王

元年襄二十九年也昭二十二年崩在位二十五年

敬王

元年昭二十三年也崩在春秋後

列國見於年表者十九

魯蔡曹衛滕晉鄭齊秦楚宋杞陳吳邾莒薛許小邾

魯十二公

隱公

不書即位

桓公

四年七年去秋冬二時

莊公

不書即位

閔公

不書即位

僖公

不書即位

文公

宣公

成公

襄公

昭公

定公

元年無正

月

哀公

五伯

春秋終入吳黃池之役吳越亦爭伯矣

齊桓公

莊十三年會北杏

宋襄公

僖十九年盟曹南

晉文公

僖二十八年戰城濮

秦穆公

文三年
伐晉

楚莊王

宣十一年
盟辰陵

晉十一世

文公

僖二十八年立
三十二年卒

襄公

僖三十三年立
文六年卒

靈公

文七年立
宣二年卒

成公

宣三年立
宣九年卒

景公

宣九年立
成十年卒

厲公

成十一年立
宣八年卒

悼公

成十年

八年立
十五年卒

平公

襄十六年立
昭十年卒

昭公

昭十一年立
十六年卒

頃公

昭十年

七年立
十年卒

定公

昭三十年立
卒在春秋後

魯三桓

仲孫氏

又曰

孟孫氏

叔孫氏

季孫氏

晉八卿

智罃

士匄

荀偃

韓起

欒黶

士魴

魏絳

趙武

晉六卿

趙氏

范氏

智氏

荀氏

魏氏

韓氏

晉三卿

魏斯

韓虔

趙籍

周來聘七

金史紀事本末卷之八
隱七年凡伯

九年南季

桓四年宰渠伯糾

五年

仍叔之子

八年家父

僖三十年宰周公

宣十年

王季子

周錫命三

莊元年榮叔

文元年毛伯

成八年召伯

周歸脈一

定十四年石尚

周賜墓四

隱元年宰咺 文元年叔服 五年榮叔召伯

周來求三

隱三年武氏子求賻 桓十五年家父求車 文九年

毛伯求金

魯君臣朝聘于周

文元年叔孫得臣二十二年叔鞅會莒故不數

僖二十八年公兩朝王所 成十三年公如京師 僖

三十年公子遂 文元年叔孫得臣 八年公孫敖

宣九年仲孫蔑 襄二十四年叔孫豹

公如齊十有一

春秋公如齊者十有五桓莊四如齊非朝故不數

僖公三

宣公六

昭公二

公如晉二十

文公二

成公四

襄公五

昭公八

定公一

公如楚二

襄公一

昭公一

魯大夫聘列國五十有六

又如齊四如宋三如晉二如陳滕各一皆因事

而往非專行聘禮故不數

如齊十有九 如晉二十有五 如陳二

如宋五 如年如衛如楚如莒如邾各一

諸侯朝魯四十

曹滕小邾各五 杞邾各七 郟二

薛紀穀鄧鄆郛葛年蕭各一

齊聘魯五

隱七年弟年 桓三年弟年 僖三十三年國歸父

宣十年國佐 襄二十七年慶封

晉聘魯十有一

成三年荀庚 八年士燮 十一年卻犇 十八年士
匄 襄元年荀罃 八年士匄 十二年士魴 二十
六年荀吳 二十九年士鞅 昭二年韓起 昭二十
一年士鞅

宋聘魯四

成四年華元 八年華元
襄十五年向戌 昭十二年華定

衛聘魯四

文四年甯俞

成三年孫良夫

襄元年公孫剽

襄七年孫林父

陳鄭秦吳聘魯各一

莊二十五年陳女叔

文十二年秦術

襄五年鄭公子發

襄二十九年吳札

楚聘魯三

莊二十三年荆人

文九年椒

襄三十年遂罷

金史紀事本末 卷之七
盟一百有九

凡盟會侵伐內為主書及外為主書會所以別首從而謹善惡之首也

始隱元年蔑

終哀二年句繹

特盟參盟同盟始終

石門于鹹特盟之始終也 瓦屋鄆陵參盟之始終也

于幽平丘同盟之始終也

同盟十有六

齊盟二皆同尊周也晉盟十有四皆同外楚也

兩幽

桓齊

新城

靈晉

清丘

斷道

虫牢

馬陵

于蒲

景晉

于戚

柯陵

厲晉

虛打

雞澤

于戲

毫城北

晉悼

重丘

晉平

平丘

晉昭

殊盟二

僖五年首止

僖九年葵丘

涖盟四

僖三年公子友如齊

文七年公孫敖如莒

昭七年叔孫婁如齊

定十一年叔還如鄭

來盟五

桓十四年鄭弟語

閔二年齊高子

僖四年楚屈完

文十五年宋司馬華孫 宣七年衛孫良夫

外大夫聘而遂盟五

成三年荀庚良夫 十一年卻犢

襄七年林父 十五年向戌

會九十七

始隱二年潛 終哀十三年黃池

殊會四

僖五年首止 成十五年鍾離

襄十年于相

襄十四年于向

遇七

志內之遇者四而皆書及若曰以此及彼然也志外之遇者三而皆以爵若曰以尊及卑

也然

隱四年遇清

莊二十三年遇穀

三十年遇魯濟

僖十四年遇防

隱八年宋衛遇垂

莊四年齊陳鄭

遇垂

三十二年宋齊遇梁丘

平五

如宣四年平
莒及鄭為六

隱六年鄭來輸平

宣十五年宋及楚平

昭七年暨

齊平 定十年及齊平 定十一年及鄭平

來七

隱元年祭伯來 桓六年實來

八年祭公來 閔元年齊仲孫來

僖二十九年兩介葛盧來 襄十八年白狄來

人自為盟三

桓十一年惡曹

中國未有伯而人自為盟

僖二十一年鹿上

中國始無伯而

人自為盟

宣十二年清丘

中國又將無伯而人自為盟

侵六十

潛師掠境曰侵

始莊十年公侵宋

終哀十三年晉魏曼多侵衛

伐二百十有三

聲罪致討曰伐

始隱二年鄭人伐衛

終哀十三年楚公子申伐陳

戰二十三

兩兵相接曰戰書敗績者十五又內兵書敗曰戰若傷公戰于井陘我師敗績

獲公胄懸諸魚門諱不書敗唯莊公乾時之敗以與讐戰雖敗不諱

始桓十年來戰于郎
終哀十一年戰于艾陵

圍四十四

緣其城
邑曰圍

始隱五年宋圍長葛

終哀七年宋人圍曹

入二十七

造其國
都曰入

始隱二年莒人入向

終哀十三年於越入吳

遷十

徙其朝
市曰遷

始莊元年齊師遷紀邢鄆郛

終哀二年蔡遷州來

滅三十

毀其宗廟社稷曰滅內兵書滅曰取若取
鄆取郛取鄆是也唯僖公滅項乃公在會

而季孫滅
之故不諱

始莊十年齊師滅譚 終定十五年楚子滅胡

敗師十有六

說道而勝
之曰敗

始隱十年公敗宋師于菅

終定十四年於越敗吳于槁李

取師三

悉虜而俘
之曰取

隱十年伐戴取之 哀九年雍丘 十三年于畝

取國邑十有六

胡氏曰取者收奪之名
趙子曰凡力得之曰取

始隱四年取年婁 終哀八年取謹及闡

襲一

輕行而掩之曰襲

襄二十三年齊侯襲莒

追二

已去而躡之曰追

莊十八年公追戎于濟西

僖二十六年公追齊至鄆弗及

戍三

聚兵而守之曰戍

僖二十八年公子買戍衛

襄五年成陳

十年成鄭虎牢

以一國而用諸侯之師三

以弱假強而能左右之曰以

桓十四年宋以四國伐鄭 僖二十六年魯以楚師伐

齊 定四年蔡以吳子伐楚

城二十有九

城者先舊也內城二十三不時害義固為罪矣雖時且義亦書見勞民為

重事也齊伯外城三邢也楚丘也緣陵也獨城邢為美晉伯外城三虎牢也杞也成周也獨成周

識無

始隱七年城中丘

終哀六年城邾瑕

築

築者創始也

莊元年築王姬之館 二十八年築郿

三十一年三築臺 成十八年築鹿園

昭九年築郎園 定十三年築蛇淵園

執三十有一

齊執者五 晉執者十五 宋執者三 邾執者一 楚執者七

始桓十一年宋人執鄭祭仲

終哀四年晉執戎蠻子赤歸于楚

獲六

凡君戰而死者曰滅生禽曰獲大夫生死皆曰獲

僖元年于酈獲莒拏 十五年于韓獲晉侯 宣二年

大棘獲宋華元 襄八年鄭侵蔡公子燮 昭二十三

年雞父獲陳夏徵舒 哀十一年艾陵獲齊國書

降二

降者脅服之詞

莊八年邾降于齊師 莊三十年齊人降鄆

潰四

民逃其上曰潰

僖四年侵蔡蔡潰 文三年伐沈沈潰

成九年伐莒莒潰 昭二十九年鄆潰

講武二

桓公有所畏而大閱非其時
莊公有所俟而治兵非其地

桓六年大閱

簡車馬也

莊八年治兵

習戰也申明軍法以整齊之也

蒐五

中春教振旅遂以蒐謂蒐索擇取
不孕者大云者偕天子之制也

昭八年蒐于紅

十一年大蒐比蒲

二十二年大蒐昌間

定十三年大蒐比蒲

十四年大蒐比蒲

狩四

中冬教大閱遂以狩
謂守取之無所擇也

桓四年于郎

莊四年于禚

僖二十八年河陽

哀十四年獲麟

乞師五

乞者卑遜自屈之辭
又曰乞不保得之辭

僖二十六年公子遂如楚

成十三年晉卻錡來

十六年晉欒黶來

十七年晉荀息來

十六年晉士魴來

次師十有三

齊次者四魯次者四齊衛次者三晉
楚次者各一伐而書次其次為善伐

楚次陘是也救而書次其次為貶聶北救邢是
也又曰莊十年次于郎見齊伯之難文十年次
厥貉見楚伯之難襄元年
次于鄆見晉復伯之難矣

始莊三年公次于滑 終定十五年齊衛次于渠蔭

制楚得失七

召陵以義勝 城濮以威勝 鄆陵以幸勝 蕭魚以

善勝 于泓以不度德不量力而敗 于邲以將不用

命而敗 召陵以求貨弗得而還

救二十三

救在王室則罪諸侯子突救衛是也救在遠國則罪四鄰晉陽處父救江是也

救在夷狄則罪中國楚貞救鄭狄救齊吳救陳是也

始莊六年子突救衛 終哀十年吳救陳

獻捷二

獻者下奉上之
詞軍獲曰捷

莊三十一年齊侯來獻戎捷

僖二十一年楚宜申來獻捷

雩二十有一

旱祭也諸侯雩于境內之山川
蓋以山川百源能興雲雨故也

書秋者七 書八月者四 書七月者二

書九月者七 書冬者一

郊九

龜違者四牛災者四非時大不敬者一蓋
郊所以祭天魯諸侯而用天子之祭僭也

僖三十一年四月卜郊 宣三年正月牛傷乃不郊

成七年正月牛傷不郊 十年四月五卜郊 十七年
九月辛丑用郊 襄七年四月三卜郊 十一年四月
四卜郊 定十五年正月牛傷五月辛亥郊 哀元年
正月牛傷四月辛巳郊

望三

望祭也望
于山川

僖三十一年

宣三年

成七年

烝嘗三

冬曰烝衆也謂萬事畢成所薦衆
多也秋曰嘗以物成而薦新為義

桓八年春正月己卯烝

夏五月丁丑烝

十四年乙亥嘗

土田十

假一 取五 歸我一 歸之于一 疆一
來歸一

災異一百二十二

日食三十六 星孛三 星隕隕石各一 不雨七

無冰三 大雨震電一 雨雪三 大雨雹三 地震

五 山崩二 大水九 有年二 大旱二 饑三

無麥苗一 大無麥禾一 隕霜不殺草李梅實一

隕霜殺菽一 雨木冰一 多麋有蜚有蜚螽生各

一 六鷁退飛一 螟三 蝻十 牛傷四 牛死二

宮室災六 震廟一 屋壞二 齊大災一 宋陳

衛鄭災一 宋陳災各一

齊桓衣裳之會十有一

北杏 兩郵 兩幽 于榿 于貫 陽穀 首止

甯母 葵丘

齊桓兵車之會四

于洮 于鹹 壯丘 于淮

晉文五書爵

侵曹 伐衛 入曹 城濮 踐土

晉襄退三強

僖三十三年敗秦于殽 敗狄于箕

伐許

許貳於楚伐許
所以離楚也

晉悼五會

雞澤

于戚

救陳

于鄒

邢丘

晉悼三駕

襄十年伐鄭

十一年伐鄭

同年伐鄭

晉平七合諸侯

溴梁

祝河

澶淵

商任

沙隨

兩夷儀

晉平五合諸侯

澶淵

于宋

城杞

澶淵

于虢

春秋五始

元者氣之始 春者四時之始 王者受命之始

正月者政教之始 即位者一國之始

孔子相魯

定十年會于夾谷 齊人來歸鄆謹龜陰田

十二年叔孫墮郕 季孫仲孫墮費

十四年石尚來歸脈

子路用魯

定十二年墮郕 墮費

子貢用魯

定十五年邾子來朝 哀七年公會吳于鄆

十二年公會吳于橐皋 公會衛宋于鄆

冉求用魯

哀十一年齊國書伐我

王人三

莊六年子突救衛 僖八年于洮

僖二十九年翟泉

命大夫三

魯單伯

鄭祭仲

陳女叔

魯三家所始

即三桓也

僖元年公子友敗莒于鄆

是役公賜季友汶陽之田及費而季孫氏始

四年公孫茲侵陳

叔孫氏始

十五年公孫敖救徐

孟孫氏始

欽定四庫全書

左傳杜林合注卷一

明 王道焜

趙如源 同編

隱公

公名息姑魯惠公之子姬姓侯爵自周公子伯禽始受封傳世二十三而至隱公攝主國

事謚法不尸其位曰隱

周

文武開基始都豐鎬幽厲板蕩平王東遷洛陽盡舉故都而棄之秦所謂東周也于是王室微弱至平王

四十九年而入春秋魯隱公三年平王崩桓王立

鄭

姬姓伯爵自桓公始受封周厲王之子宣王之弟也傳世武公莊公莊公元年封弟段于京二十二年克

段于鄒
入春秋

齊

姜姓侯爵自太公相武王定殷受封于齊受命專征侯伯傳世十三至僖公九年入春秋

宋

子姓公爵周武王定殷邦封微子啟于宋以奉殷祀傳世十四至穆公七年入春秋魯隱公三年穆公卒

弟殤公
與夷立

晉

姬姓侯爵自唐叔始受封傳世十一而至昭侯昭侯封文侯之弟成師于曲沃晉始亂分為二以翼曲沃

之別

翼

昭侯之後傳孝侯鄂侯鄂侯二年入春秋隱公五年曲沃伐翼翼侯奔隨王命競公立鄂侯之子光于翼

是為哀侯隱公六年晉逆晉侯于隨納諸鄂謂之鄂侯

曲沃

成師之後傳曲沃莊伯曲沃莊伯之十一年十一月魯隱公之元年正月也蓋用夏正建寅之

月為歲首不惟改元又改歷矣隱公七年曲沃莊伯卒子稱代立是為曲沃武公

衛

姬姓侯爵自康叔始受封傳世十三至桓公十三年入春秋魯隱公四年衛州吁弑桓公自立冬殺州吁

宣公
晉立

蔡

姬姓侯爵蔡叔之子蔡仲率德改行成王復封于蔡傳世十三至宣公二十八年入春秋魯隱公八年宣

公卒子桓
侯封人立

曹

姬姓伯爵自曹叔振鐸始受封傳世十二至桓公終生三十五年入春秋

滕

姬姓侯爵至魯隱公七年見滕侯卒其後稱子蓋為時王所黜

陳

媯姓侯爵舜之後自胡公始受封傳
世十二至桓公二十三年入春秋

杞

姒姓侯爵夏禹之後自東樓公始受封傳五世至武
公二十二年入春秋魯莊公二十七年書杞伯來朝

蓋為時王所黜
其後又稱子

薛

任姓侯爵至魯隱公十一年見來朝莊公三十一年見
書薛伯卒蓋為時王所黜其後至昭公三十一年見

莒薛
獻公

莒

己姓子爵至魯文
公十八年見庶其

邾

曹姓附庸國自儀父入春秋後為
子至魯莊公十六年書邾子克卒

許

姜姓太嶽之後至魯隱公十一年見許莊公及許叔
魯桓公十五年許叔入于許即魯僖公四年許男新

臣卒葬許
穆公也

小邾 曹姓顓頊之後魯莊公五年書邾邾來來朝蓋附庸而未爵命其後數從春桓公尊王室王命為諸

侯至魯僖公七年始書小邾子

楚 芊姓子爵自熊繹始受封八世至熊渠立其長子康為句重王中子紅為鄂王少子執疵為越章王此僭

王之始也又八世至熊儀是為若敖又二世至熊駒是為蚡冒又一世熊通是為楚武王武王十九年入

春秋

秦 嬴姓伯爵顓頊之後也殷有蜚廉周有造父周孝王使非子畜馬蕃息分土為附庸邑之秦六世至襄公

將兵救周送平王東遷有功封為諸侯襄公卒文公立文公四十四年是為隱公元年又六世至穆公任

好十五年魯僖公十五年始見春秋

吳姬姓子爵自大伯祚吳五世至周章而武王克殷因封之吳又十四世至壽夢而吳始益大稱王魯成公

七年始見春秋

越

其先禹之苗裔少康之庶子也封於會稽以奉禹祀後二十餘世至於允常魯昭公五年偕楚伐吳始見

于春秋允常與閭閻戰而相怨伐定公十四年允常卒子句踐立是為越王是年吳伐越越敗之于槁李

傳惠公元妃孟子

杜言元妃明始適夫人也子宋姓林元大也嘉耦曰妃始嫡夫人也口惠

公名不皇諡法愛人好與曰惠其子隱公讓國之君妃芳非反

孟子卒

杜不稱薨不成喪也無諡先夫死

不得從夫諡

繼室以聲子生隱公

杜聲諡也蓋孟子之姪娣也諸侯始娶則同姓之國以

姪娣膝元妃死則次妃攝治內
事猶不得稱夫人故謂之繼室
宋武公生仲子仲子生而

有文在其手曰為魯夫人

林蓋手理自然成文字如魯季友有文在其手曰友唐叔

有文在其手曰虞之類

故仲子歸于我

杜婦人謂嫁曰歸以手理自然成字有若天命故嫁

之

生桓公而惠公薨

杜言歸魯而生男惠公不以桓生之年薨是以隱公

立而奉之

杜隱公繼室之子當嗣世以禎祥之故追成父志為桓尚少是以立為太子帥國人奉之

為經元年春不書即位傳

經未元年春王正月

杜隱公之始年周王之正月也凡人君即位欲其體元以居正故不

言一年一月也隱雖不即位然攝行君事故亦朝廟告朔也告朔朝正例在襄二十九年即位例在隱莊閔僖

元年林孔子因魯史作春秋故以魯紀年而書王正月見周之正朔猶行於天下也周正建子正月子月也其曰元年春王正月者謂之體元居正告朔朝正其義皆通無事而書春王正月者無事必書首時謹始也

○三月公及邾儀父盟于蔑

杜附庸之君未王命例稱名能自通于大國繼好息

民故書字貴之名例在莊五年邾今魯國鄒縣也蔑姑蔑魯地魯國卞縣南有姑城林此私盟之始○父音甫邾子之字凡人名字皆倣此蔑亡結反

○夏五月鄭伯克段于鄆

杜不稱國討而

言鄭伯譏失教也段不弟故不言弟明鄭伯雖失教而段亦凶逆以君討臣而用二君之例者言段強大雋傑據大都以耦國所謂得雋曰克也國討例在莊二十二年得雋例在莊十一年母弟例在宣十七年鄭在燹陽宛陵縣西南鄆今潁川鄆陵縣○段徒亂反

鄭伯弟名鄆於晚反又於建反又於然反

○秋七月

天王使宰咺來歸惠公仲子之賵

杜宰官咺名也咺贈死不及尸弔生不及

哀豫凶事故敗而名之此天子大夫稱字之例仲子者桓公之母婦人無諡故以字配姓來者自外之文歸者不反之辭林賵助喪之物時惠公已莖仲子未薨因賵惠公而併賵仲子也賵惠公而併賵仲子者皆非禮也

○咺吁阮反賵芳鳳反

○九月及宋人盟于宿

杜客主無名皆微者也宿小國東平

無鹽縣也凡盟以國地者國主亦與盟例在僖十九年宋今梁國睢陽縣林魯宋宿三國共為盟參盟之端見矣

○冬十有二月祭伯來

杜祭伯諸侯為王卿士者祭國伯爵也傳曰非王命也釋

其不稱使林案內諸侯為主卿士者私來魯也此私交之始○祭側界反傳祭仲同

○公子益師

卒

杜傳例曰公不與小飲故不書日所以示薄厚也春秋不以日月為例唯卿佐之喪獨記日以見義者事

之得失既未足以褒貶人君然亦非死者之罪無辭
可以寄文而人臣輕賤死日可略故特假日以見義○

傳元年春王周正月

杜言周以別夏殷林言周正月以見建子且別夏殷也

不書

即位攝也

杜假攝君政不修即位之禮故史不書於策傳所以見異於常林隱公將讓國於桓公故

假攝君事也

○三月公及邾儀父盟于蔑邾子克也未王命

故不書爵曰儀父貴之也

杜王未賜命以為諸侯其後儀父服事齊桓以獎王室王

命以為邾子故莊十六年經書邾子克卒林及者內為主也邾子名克字儀父也王未命為諸侯未有爵可書名不如字今書字以知其貴之也至莊十六年書邾子克卒得王命矣○故不書爵一本無故字

公攝

位而欲求好於邾

林及我欲之以知隱公欲求好於邾○好呼報反

故為蔑之

盟杜解所以與盟也 ○夏四月費伯帥師城郎不書非公命也

杜費伯魯大夫郎魯邑高平方與縣東南有郁郎亭傳曰君舉必書然則史之策書皆君命也今不書于經亦因史之舊法故傳釋之諸魯事傳釋不書他皆倣此林君舉必書今不書城郎以知其非君命故也○費音秘

○初鄭武公娶于申曰武姜杜中國今南陽宛縣林姜申姓武姜從夫諡 生莊

公及共叔段杜段出奔共故曰共叔猶晉侯在鄂謂之鄂侯○共音恭共地名凡國名地名人名

字氏族皆不重音 莊公寤生驚姜氏故名曰寤生遂惡

之莊公已生非也如此當喜何得復驚而惡之林杜氏謂寤寤而

寤生生之難是也此當為難生故武姜困而後寤武姜 因寤而驚以其事名莊公○寤五故反惡烏路反

愛共叔段欲立之

林惡長子故愛次子欲立以為太子

亟請於武公公弗

許及莊公即位為之請制

林亟數也武姜數請于武公使立段武公不從姜請武

公既卒莊公即位為君武姜為段請於莊公欲以制邑封段○亟欺冀反為于偽反

公曰制巖邑

也

林制邑在鄭巖險之邑也巖本又作嚴五衛反

號叔死焉佗邑唯命

杜

叔東號君也恃制巖險而不修德鄭滅之恐段復然故開以佗邑號國今熒陽縣林言制不可封段若欲佗邑則唯武姜之命是聽○號爪伯反

請京使居之謂之京城大叔

杜公順姜請使

段居京謂之京城大叔言寵異於眾臣京鄭邑今熒陽京縣○大音泰下皆同

祭仲曰都城過

百雉國之害也

杜祭仲鄭大夫方丈曰堵三堵曰雉一雉之牆長三丈高一丈侯伯之城方五

里徑三百雉故其大都不得過百雉林凡邑有宗廟先
君之主曰都無曰邑邑曰築都曰城過百雉言城之周
圍過三百丈之數○過先王之制大都不過參國之一
古卧反獲不音者皆同

中五之一小九之一今京不度非制也君將不堪

林總言先

王建立都城之法制大邑參分其國城一分之大小中
邑五分其國城一分之大小小邑九分其國城一分之
大小今京城太廣不合三等之法度非先王都城之制
也此言尾大不掉莊公將不堪叔段據有大都之害○
韓曰此數言遂為後世封宗藩之本魏以之疑晉
以之敗猜與任皆不合也○參七南反又音三

公曰

姜氏欲之焉辟害

林言武姜欲大封叔段安所
逃避其禍害○焉於虔反

對曰姜

氏何厭之有不如早為之所無使滋蔓蔓難圖也蔓草

猶不可除况君之寵弟乎

林言武姜何厭足之有不如早為區處使得其所無使叔

段之惡如草之滋長蔓延及至蔓延難為圖謀草之蔓延尚不可芟除何况叔段為莊公愛寵之弟可得而治

乎○厭平聲蔓音萬公曰多行不義必自斃子姑待之

林不忠於君不義也

言段據有大邑必多行不義之事恐不積不足以滅身不義既多必自斃踣子謂祭仲言仲且少待之杜斃踣

也姑且也○斃婢世反本又作弊既而大叔命西鄙北鄙貳於已

林既卒事

也鄙鄭邊邑貳兩屬也今屬鄭之邑兩屬于已

公子呂曰國不堪貳君將若之

何欲與大叔臣請事之若弗與則請除之無生民心

林公

子呂鄭大夫言國家不可使人有攜貳兩屬之心若欲以鄭國傳與叔段我請服事大叔無生其怨若不與叔

段則請除去大叔無長其惡生鄭國攜貳之心蓋異者可同離者可合生者不死不死則日長日大甚可畏也

杜叔久不除則舉公曰無庸將自及杜言無庸除之段將自及於禍大

叔又收貳以為己邑杜前兩屬者今皆取以為己邑至于廩延杜言轉侵多也

廩延鄭邑陳留酸棗縣北有延津林子封曰可矣厚將

得衆杜子封公子呂也厚謂土地廣大公曰不義不暱

厚將崩杜言不義於君不親於凡非衆所附雖厚必崩林言不義之人不為衆所親暱厚而無基將如牆

屋自然崩塌○大叔完聚繕甲兵具卒乘林完城郭聚

甲冑與兵器具備其步卒與車乘杜步曰卒車曰乘將襲

鄭夫人將啟之

林無鐘鼓曰襲將掩鄭國之不備夫公人即武姜將開段而道之杜啟聞也

聞其期曰可矣

林可以有辭討段

命子封帥車二百乘以伐京

京叛大叔段段入于鄆公伐諸鄆五月辛丑大叔出奔

共

林古者兵車一乘甲士三人步卒七十二人二百乘蓋甲士六百人步卒一萬四千四百人以伐段於京

邑京城之人叛渙不助叔段段既為京人所叛乃走入于鄭之鄆邑莊公伐段于鄆大叔大敗出奔共國杜共

國今汲郡共縣○共音恭

書曰鄭伯克段于鄆段不弟

林不盡為弟之道故

不言弟如二君

林言段強大雋傑與鄭如二君然觀諸叔于田等詩段之強大可知

故曰

克稱鄭伯譏失教也

林直書鄭伯克段不為之諱譏刺鄭莊公失教訓子弟之道至於用

兵母子兄弟
自相殘賊

謂之鄭志不言出奔難之也

杜傳言夫子作春秋改舊

史以明義不早為之所而養成其惡故曰失教段實出奔而以克為文明鄭伯志在於殺難言其奔○難乃旦

反

遂寘姜氏于城潁而誓之曰不及黃泉無相見也

林城

潁鄭地遂繼事也克段繼事寘武姜于別邑以絕之也地中之泉曰黃泉言生無復與母相見至死後方相見於地下○寘既而悔之潁考叔為潁谷封人聞之有獻之政反置也

於公公賜之食食舍肉公問之對曰小人有母皆嘗小

人之食矣未嘗君之羹請以遺之

林既誓卒事悔其誓言之失潁谷即城潁

之谷時潁考叔為潁谷典封疆之人稱人小吏也獻者卑奉尊之辭或以計謀或以時物獻于莊公皆曰獻莊

公賜考叔以飲食考叔食公所賜之食而舍置其肉味
公問舍肉之故考叔自稱有母在母所食徧嘗小人之
食矣未曾得食國君之羹請留所賜以遺母氏杜食而不
啜羹欲以發問也宋華元殺羊為羹饗士蓋古賜賤官
之常○舍音捨公曰爾有母遺繫我獨無林言考叔有母可以遺食

我獨無母可遺杜繫語助
○繫烏兮反又烏帝反 穎考叔曰敢問何謂也公語

之故且告之悔林據莊公母武姜尚在故疑而問公告以真姜誓姜之故且告以今悔之無及

已○語
魚據反 對曰君何患焉若闕地及泉隧而相見其誰曰

不然林言莊公何憂於黃泉之誓闕掘也若掘地及泉水之處即是黃泉隧地中道也為地中隧道與姜

相見誰敢以此說為不然也杜隧 公從之公入而賦大
若今延道○闕其月反隧音遂

隧之中其樂也融融

林賦賦詩也大隧之中想當時所賦之詩今無存不可復考融融

和樂相得之貌○樂音洛下同融羊弓反

姜出而賦大隧之外

林想亦當時武姜所賦之

詩

其樂也洩洩

林洩洩舒散相得之貌○洩羊世反

遂為母子如初君子

曰穎考叔純孝也愛其母施及莊公

林按左傳稱君子曰多是採取當時

君子之言或斷以已意後稱君子曰倣此施猶廣也言能廣施孝道感悟莊公○施以豉反又式智反

詩

曰孝子不匱永錫爾類其是之謂乎

杜不匱純孝也莊公雖失之於初孝心

不忘考叔感而通之所謂永錫爾類詩人之作各以情言君子論之不以文害意故春秋傳引詩不皆與今說詩者同他皆倣此林舉大雅既醉詩孝子之心無有窮匱長以已之孝誠錫及其儔類皆為孝也言考叔之孝

足當是詩之所謂也。○ 匱其位反

○ 秋七月天王使宰咺來歸惠公仲

子之賵緩且子氏未薨故名

杜惠公葬在春秋前故曰緩也子氏仲子也薨在二

年林一舉兩事皆非禮故名咺示賵

天子七月而葬同軌畢至

杜言同軌以別四夷

之國林中國廣大不七月不足以盡遠人之情車同軌言極四海之內同軌之諸侯莫不盡至

諸侯五

月同盟至

林五月而葬殺於天子同方嶽之盟其地漸近故五月可至不言畢至不至無所拘也

大夫三月同位至

林三月而葬殺於諸侯古者行役不踰時故三月而同位至

士踰

月外姻至

林過月而葬殺於大夫姻親也外親愈近故過月可至杜此言赴弔各以遠近為差因為

葬節贈死不及尸

杜尸未葬之通稱林贈賜死者不及其尸在殯之時

弔生不及哀

杜諸侯已上既葬則繚麻除無哭位諒間終喪林赴弔生者不及其哀哭方戚之時豫凶事非禮

也杜仲子在而來賄故曰豫凶事林二事皆非禮也○韓曰數語已備喪禮覺徐勉之為煩○八月

紀人伐夷夷不告故不書杜夷國在城陽莊武縣紀國在東莞劇縣隱十一年傳例

曰凡諸侯有命告則書不然則否史不書於策故夫子亦不書于經傳見其事以明春秋例也他皆倣此有

蜚不為災亦不書杜莊二十九年傳例曰凡物不為災不書又於此發之者明傳之所據非

唯史策兼采簡牘之記也他皆倣此林蜚負蟻也蓋食苗蟲之屬不為田野之害亦不書於經也○蜚扶味反

○惠公之季年敗宋師于黃杜黃宋邑陳留外黃縣東有黃城○敗必邁反敗他

也後倣此公立而求成焉九月及宋人盟于宿始通也杜經無義

例故傳直言其歸趣而已他皆倣此林魯宋始通好命

○冬十月庚申改葬惠公

公弗臨故不書

杜以桓為大子故隱公讓而不敢為喪主隱攝君政故據隱而言

惠公

之薨也有宋師大子少葬故有闕

林葬禮有所闕少○少詩熙反

是以

改葬

林詳述所以改葬之故

○衛侯來會葬不見公亦不書

杜諸侯會

葬非禮也不得接公成禮故不書於策他皆倣此衛國在汲郡朝歌縣

○鄭共叔之亂

林即

叔公孫滑出奔衛

杜公孫滑共叔段之子滑于八反又乎八反

衛人為之伐

鄭

林為公孫滑伐鄭報仇○為于偽反

取廩延鄭人以王師競師伐衛南

鄙

杜競西競國也弘農陝縣東南有競城林凡師能左右之曰以蓋鄭以周競之師伐衛南鄙討公孫滑之

也亂請師於邾邾子使私於公子杜公子豫魯大夫私

邾邾使人私請師於邾邾使人私請師豫請往公弗許遂行及邾人鄭人盟

于翼林預請於公欲往會師隱公不從豫不書非公命

也杜豫私會盟故○新作南門不書亦非公命也杜非

不書三見者皆興作大事各舉以備文林二事以見大夫專擅之端○十二月祭伯來非

王命也林以王臣無王命而私○衆父卒杜衆父公子益

終公不與小斂故不書日杜禮卿佐之喪小斂大斂君

之所篤禮之所崇故以小斂為文至于但臨大斂

及不臨喪亦同不書日林小斂始死之斂蓋隱公不親

臨衆父始死之歛故不書衆父卒日蓋傳者釋經有書日書月書時之例○與音預歛力驗反

經申

二年春公會戎于潛

杜戎秋夷蠻皆氏羌之別種也戎而書會者順其俗以為

禮皆謂居中國若戎子駒支者陳留濟陽縣東南有戎城潛魯地林戎之近於魯者此外交之始也是故會戎于潛春秋之始會吳黃池春秋之終此春秋之所以終始也○夏五月莒人入向杜

小國也譙國龍亢縣東南有向城莒國今城陽莒縣也將卑師少稱人弗地曰入例在襄十三年林此入國之始也○向○無駭帥師入極杜無駭魯卿極附庸小國舒克反○無駭不書氏未賜族賜族

例在八年林無駭帥師大夫○秋八月庚辰公及戎盟專兵之端見矣○駭戶楷反○秋八月庚辰公及戎盟

于唐

杜高平方與縣北有武唐亭八月無庚辰庚辰七月九日也日月必有誤林唐魯地此盟戎之始也

○九月紀裂繻來逆女

杜裂繻紀大夫傳曰卿為君逆也以別卿自逆也逆女或稱使

或不稱使昏禮不稱主人史各隨其實而書非例也他皆倣此

○冬十月伯

姬歸于紀

杜無傳伯姬魯女裂繻所逆者

○紀子帛莒子盟于密

杜子帛裂繻字

也莒魯有怨紀侯既昏于魯使大夫盟莒以和解之子帛為魯結好息民故傳曰魯故也比之內大夫而在莒子工稱字以嘉之也字例在閔元年密莒邑城陽淳子縣東北有密鄉林此外特相盟之始也○帛音白○

十有二月乙卯夫人子氏薨

杜無傳桓未為君仲子不應稱夫人隱讓桓以為大

子成其母喪以赴諸侯故經於此稱夫人也不反哭故不書葬例在三年

○鄭人伐衛

杜凡師有

鐘鼓曰伐例在莊二十九年林伐天子之權此諸侯專征伐之始

傳二年春公會戎于潛修惠公之好也戎請盟公辭

杜許

其修好而不許其盟禦夷狄者不壹而足林惠公與戎有好隱公立而修之戎請與公盟公辭我不與之盟。

好呼報反下同

○莒子娶于向向姜不安莒而歸夏莒人入向

以姜氏還

杜傳言失昏姻之義凡得失小故經無異文而傳備其事案文則是非足以為戒他皆倣

此林姜向女姓不安莒者琴瑟不和故不安于莒而歸其父母之國莒怒其妻而入其父母之國以其妻歸。還音

旋後皆同

○司空無駭入極費庠父勝之

杜魯司徒司馬司空皆卿也庠父費

伯也前年城郎今因得以勝極故傳於前年發之。庠音琴

○戎請盟秋盟于唐復

修戎好也

林戎復請與魯盟隱公與戎盟再修和戎之好也。復扶又反

○九月紀裂

縹來逆女卿為君逆也

林言卿為君逆以別非裂縹自逆也。為于偽反。

○冬

紀子帛莒子盟于密魯故也。○鄭人伐衛討公孫滑之亂也。

杜治元年取康延之亂

經 辛酉 三年春王二月己巳日有食之

杜無傳日行遲一歲一周天月行疾

一月一周天一歲凡十二交會然日月動物雖行度有
大量不能不小有盈縮故有雖交會而不食物或有頻
交而食者惟正陽之月君子忌之故有伐鼓用幣之事
今釋例以長歷推經傳明此食是二月朔也不書朔史
失之書朔日例在桓十七年林日月交會于朔食之則
食未有非交會而食者也此不食朔官失之也。○己巳
上音紀下音祀後倣此。○三月庚戌天王崩。
食如字本或作蝕音同。○三月庚戌天王崩。

杜周平王也實以壬

成崩欲諸侯之速至故遠日以赴春秋不書實崩日而書遠日者即傳其偽以懲臣子之過也襄二十九年傳曰鄭上卿有事使印段如周會葬今不書葬魯不會林平王崩桓王立

○夏四月辛卯君

氏卒

林隱公之母也隱不敢從正君之禮亦不敢備禮於其母

○秋武氏子來求賻

杜武氏子天子大夫之嗣也平王喪在殯新王未得行其爵命聽於冢宰故傳曰王未葬釋其所以稱父族又不稱使也魯不共奉王喪致令有求經直文以示不敬故傳不復具釋也林賻助喪之物此來求之始○賻音附

○八月庚辰宋公和卒

杜稱卒者畧外以別內也元年大夫盟於宿故來赴以名例在

七年林穆公卒殤公立

○冬十有二月齊侯鄭伯盟于石門

杜來告故

書石門齊地或曰濟北盧縣故城西南濟水之門林此時相盟之始書石門以志諸侯之合書醢以志諸侯之

散以見春秋之終始齊鄭為之也

○癸未葬宋穆公

杜無傳魯使大夫會葬故書始死書

卒史在國承赴為君故惡其薨名改赴書也書葬則舉謚稱公者會葬者在外據彼國之辭也書葬例在昭六年

傳三年春王三月壬戌平王崩赴以庚戌故書之○夏

君氏卒聲子也不赴于諸侯不反哭于寢不祔于姑故

不曰薨不稱夫人故不言葬

杜夫人喪禮有三薨則赴于同盟之國一也既葬日

中自墓反虞于正寢所謂反哭于寢二也卒哭而祔於祖姑三也若此則書曰夫人某氏薨葬我小君某氏此備禮之文也其或不赴不祔則為不成喪故死不稱夫人薨葬不言葬我小君某氏反哭則書葬不反哭則不書

墓今聲子三種皆闕釋例論之詳矣○附音附

不書姓為公故曰君氏

杜不書姓辟正

夫人也隱見為君故特書於經稱曰君氏以別凡妾媵○為于偽反

○鄭武公莊公為平

王卿士

杜卿士王卿之執政者言父子秉周之政

王貳于虢

杜虢西虢公亦任王朝王欲分政

於虢不復專任鄭伯

鄭伯怨王王曰無之故周鄭交質王子狐為

質於鄭鄭公子忽為質於周

林交質子以為信王子狐平王子忽鄭莊公子○質

音致下同

王崩周人將畀虢公政

杜周人遂成平王本意○畀必二反與也

四月

鄭祭足帥師取溫之麥秋又取成周之禾

杜四月今二月也秋今之

夏也麥禾皆未熟言取者蓋芟踐之溫今河內溫縣成周洛陽縣也○祭側界反

周鄭交惡

杜兩相疾

惡

君子曰信不由中質無益也明恕而行要之以禮雖

無有質誰能間之

林言周鄭之誠信不出於中心以子交質無益於事明則彼此相知恕則

彼此相諒若能明恕而行其事要結之以上下大小之禮節雖無以子交質之事誰能離間其交○要於遠反

間去聲

苟有明信澗谿沼沚之毛

林山谿為澗通川為谿方池為沼小渚為沚毛

草也○谿苦兮反爾雅云山夾水曰澗山瀆無所通曰谿沼之紹反沚音止亦音市本又作時

蘋蘩蕓

藻之菜

杜蘋大萍也蘩蒿蘓藻聚藻也林皆可以為菜○蘋音頻蘩音煩蘓紆紉反藻音早

筥錡釜之器

林方曰筥圓曰筥皆竹器有足曰錡無足曰釜皆金器○筥丘芳反筥九呂反錡其

錡反筥筥皆器也

潢汙行潦之水

杜潢汙停水行潦流潦○潢音黃汙音烏潦音老

可薦

於鬼神

林薦享也言雖微物可薦享於鬼神也

鬼神天神人鬼也

可羞於王公

杜羞也

林亦言微物可進於王公之貴也

而況君子結二國之信行之以禮又

焉用質

杜通言盟約彼此之情故言二國之馬於虔反

風有采繁采蘋

杜采繁采蘋詩國

風義取於不嫌薄物

雅有行葦洞酌

杜詩大雅也行葦篇義取忠厚也洞酌篇義取雖行潦可以共祭

祀也○葦子鬼反洞音迴

昭忠信也

杜明有忠信之行雖薄物皆可用

○武氏子來

求賻王未葬也

林平王未葬故求賻以葬王室事可知已

○宋穆公疾召大

司馬孔父而屬殤公焉曰

林孔父嘉為宋大司馬孔子六世祖也殤公名與夷宣公

之子穆公之姪蓋以殤公託之孔父使立為國君此以下並穆公託孔父之辭○屬章欲反殤舒羊反

先

君舍與夷而立寡人寡人弗敢忘若以大夫之靈得保

首領以沒先君若問與夷其將何辭以對請子奉之以

主社稷寡人雖死亦無悔焉

林先君謂宣公穆公之兄也蓋言宣公舍其子與夷

而立寡人不敢忘宣公之德若以汝之威靈得保全首領而善終宣公若問其子將以何言辭對宣公之問請奉與夷以為君以主宋國社稷之事我雖即死亦無愧悔於先君之前○舍音捨與如字一音餘沒本亦作歿同

對曰羣臣願奉馮也

杜馮穆公子莊公也林言羣臣願奉馮為君不願立殤公○馮皮冰

反本亦作憑

公曰不可先君以寡人為賢使主社稷若棄德

不讓是廢先君之舉也豈曰能賢光昭先君之令德可

不務乎吾子其無廢先君之功

林言不可立馮宣公以我為有賢德使我為宋國社

稷祭祀之主若我棄邈讓之德不與與夷是廢宣公舉賢之意也豈足稱賢宣公以國讓我今我又以國讓與

夷是光明宣公讓國之美德可不以此為先務乎謂孔父當成我意其無廢先君舉賢之功杜先君以舉賢為

功我若不賢是廢之使公子馮出居于鄭杜辟傷公也八月庚辰宋穆公

卒殤公即位君子曰宋宣公可謂知人矣立穆公其子

饗之命以義夫

林言宣公可謂有知人之明不立其子而立弟穆公卒又立宣公之子是其子

享有天祿也讓國義也言宣公能以義制命杜命出於義也夫語助商頌曰殷受命

咸宜百祿是荷其是之謂乎

杜詩頌言殷湯武丁受命皆以義故任荷天之百祿

也帥義而行則殤公宜受此命宜荷此祿公子馮不帥父義忽而出奔因鄭以求入終傷咸宜之福故知人之稱唯在宣公也殷禮有兄弟相及不必傳子孫宋其後也故指稱商頌林言宣公以義制命能使其子任荷天祿合此詩之義也○頌似用反荷本又作何何可反○冬齊鄭盟于石門尋盧之

盟也

杜盧盟在春秋前盧齊地今濟北盧縣故城○尋盟修好也

庚戌鄭伯之車儋

于濟

林既盟而過大風傳記異也十月二月無庚戌日誤○儋弗問及仆也

○衛莊公娶于

齊東宮得臣之妹曰莊姜

杜得臣齊大子也大子不敢居上位故常處東宮林妹大

子女弟蓋衛莊姜齊大子之妹也莊姜從夫謚也

美而無子衛人所為賦碩人也

杜碩人詩義取莊姜美于色賢于德而不見答終以無子國人愛之○為于偽反又娶于陳曰厲

媼生孝伯早死其娣戴媼生桓公莊姜以為己子

杜陳今陳

國陳縣媼陳姓也厲戴皆謚雖為莊姜子然大子之位未定林莊姜無子故養桓公猶己之子○媼九危反

公子州吁嬖人之子也

杜嬖親幸也○吁況于反嬖必計反賤而得幸曰嬖

有寵

而好兵公弗禁

林母嬖故州吁有寵而好甲兵之事莊公不禁止○好呼報反禁居媼反一音

金莊姜惡之石碯諫曰臣聞愛子教之以義方

杜石碯衛大夫

林義以方外教子以方外之義○惡烏路反碯七略反

弗納于邪驕奢淫佚所自

邪也四者之來寵祿過也將立州吁乃定之矣若猶未

也階之為禍

林納入也弗入邪僻不正驕矜陵物奢侈僭上淫慾無度佚蕩放恣此四者不正之

自起四者皆自外至故曰來寵祿大過則四者不期而
自生也杜言將立為天子則宜早定若不早定州吁必
緣寵而為禍○邪似
嗟反下同沃音逆
夫寵而不驕驕而能降降而不憾

憾而能眴者鮮矣

杜如此者少也降其身則必恨恨則思亂不能自安自重林得君寵愛而

不驕矜已驕而能自降其心強降其心而不怨憾有怨憾之心而能自重其身能如是者少矣○夫音扶發句之端後倣此憾本又作憾同胡暗反恨也眴之忍反重也鮮息淺反少也且夫賤妨貴少陵

長遠間親新間舊小加大淫破義所為六逆也君義臣

行父慈子孝兄愛弟敬所謂六順也去順效逆所以速

禍也君人者將禍是務去而速之無乃不可乎

林以庶孽之賤

而妨害嫡長之貴以卑少而陵犯尊長以疎遠而離間
親近以新進而離間者舊以小國而加兵大國以淫慾
而破壞義理此六者皆逆天之理君能制命為義臣能
行君之義為父而慈愛其子為子而孝順其父為兄而
友愛其弟為弟而恭敬其兄此六者皆順天之理去六
順而效六逆所以自速其禍難也君乎人者將禍難是
先去寵州吁而弗禁其好兵是去順效逆以速禍難必
不可也杜小國而加兵於大國如息侯伐鄭之比○妨
音芳少詩照反長
丁文反去起呂反
弗聽其子厚與州吁游禁之不可桓公
立乃老
杜老致仕也四年經書州吁
弑其君故傳先經以始事

經

壬戌

四年春王二月莒人伐杞取牟婁

杜無傳書取言
易也例在襄十

三年杞國本都陳留雍丘縣推尋事跡桓六年淳于公亡
國祀似并之遷都淳于僖十四年又遷緣陵襄二十九

年晉人城杞之淳于杞又遷都淳于年妻杞邑城陽諸縣東北有妻鄉林此伐國取邑之始○杞音起年亡侯

反

○戊申衛州吁弑其君完

杜稱臣弑君臣之罪也例在宣四年戊申三月十七

日有日而無月○弑本又作殺同音弑凡弑君之例皆倣此可以意求不重音完音丸

○夏公及宋

公遇于清

杜遇者草次之期二國各簡其禮若道路相逢遇也清衛邑濟北東阿縣有清亭林此特

相遇之始

○宋公陳侯蔡人衛人伐鄭

林此諸侯會伐之始亦東諸侯分黨之始

于是齊鄭一黨也魯宋陳蔡衛一黨也東諸侯分黨而天下始多故也

○秋翬帥師會宋公陳侯蔡

人衛人伐鄭

杜公子翬魯大夫不稱公子疾其固請強君以不義也諸外大夫賤皆稱人至於內

大夫賤則皆去族稱名於記事之體他國可言某人而已魯之卿佐不得言魯人此所以為異也翬溺去族傳

曰疾之叔孫豹則曰言違命此其例也林此大夫專將之始於是輩得兵而循至於弑君矣○輦許歸反○

九月衛人殺州吁于濮

杜州吁弑君而立未列於會故不稱君例在成十六年濮陳地

水名林於吳州吁不稱公子石碣得書人討賊之義著矣○濮音卜○冬十有二月衛人

立晉

杜衛人逆公子晉而立之善其得衆故不書入於衛變文以示義例在成十八年林桓公弟宣公立

傳四年春衛州吁弑桓公而立○公與宋公為會將尋

宿之盟未及期衛人來告亂夏公及宋公遇于清

杜宿盟在

元年林因衛亂而簡其禮以相見

○宋殤公之即位也公子馮出奔鄭

鄭人欲納之及衛州吁立將修先君之怨於鄭

杜謂二年鄭人伐

衛之怨

而求寵於諸侯以和其民

杜諸葛立者諸侯既與之會則不復討故欲求此

寵

使告於宋曰君若伐鄭以除君害

杜害謂宋公子馮

君為主敵

邑以賦與陳蔡從則衛國之願也

杜言舉國之賦調林敵邑衛自謂言以衛

國之賦調與陳蔡之兵從宋。從才用及

宋人許之於是陳蔡方睦於衛

杜蔡

今汝南上蔡縣

故宋公陳侯蔡人衛人伐鄭圍其東門五日而

還公問於衆仲曰衛州吁其成乎

杜衆仲魯大夫林言州吁其成為君乎

對曰臣聞以德和民不聞以亂

林惟有德可以得民和不聞以兵亂之道杜亂

謂阻兵而安忍以亂猶治絲而棼之也

杜絲見棼緼益所以亂林治絲之道以和緩為

先勢猶紛也若紛之益見亂而難治和民之道猶是○勢扶云反

夫州吁阻兵而安忍

阻兵無衆安忍無親衆叛親離難以濟矣

林恃其兵戈而安於殘忍

杜恃兵則民殘民殘則衆叛安忍則刑過刑過則親離

夫兵猶火也弗戢將自焚

也

林譬之于火若不戢止將自焚其身○戢莊立反

夫州吁弑其君而虐用其民

於是乎不務令德而欲以亂成必不免矣

林文德武德是為令德令

美也此言州吁不先務於文武之美德而欲以兵亂成功必不免於禍

○秋諸侯復伐鄭

宋公使來乞師

杜乞師不書非卿

公辭之

杜從衆仲之言

羽父請以師

會之

杜羽父公子翬

公弗許固請而行

林隱公不從羽父之請羽父固請于公而以師

行

故書曰翬帥師疾之也

林疾惡羽父專兵以會諸侯故不書公子翬惡之也諸

侯之師敗鄭徒兵取其禾而還

林重言諸侯之師以見非翬獨敗鄭兵言敗徒

兵以別其時非車戰

○州吁未能和其民厚問定君於石子

林州吁好

亂故未能和其人民厚石厚石子石碯厚之父也厚以州吁不安諮問於其父

石子曰王覲為

可

林石碯答其子惟朝王為可安○覲其斯反見也

曰何以得覲曰陳桓公方

有寵於王陳衛方睦若朝陳使請必可得也厚從州吁

如陳

林陳桓公方有眷寵於王陳方與衛親睦若州吁往朝于陳使陳為衛請命於王必可得朝覲於王

也如往也往陳行朝禮此時陳桓公尚存未應有謚蓋左氏追書之○朝直遙反

石碯使告于

陳曰衛國偏小老夫耄矣無能為也此二人者實弑寡

君敢即圖之

杜八十曰耄稱國小已老自謙以妻陳使因其往就圖之林言國小身老無能為役

敢請陳因其來朝而就圖討之○陳人執之而請蒞於

衛

林從石碣而報州吁石厚請衛人自臨討之○蒞音利又音類臨也

九月衛人使右宰

醜

林右宰官名醜衛臣

蒞殺州吁于濮石碣使其宰獮羊肩

林石碣之

家宰也○孺奴侯反

蒞殺石厚于陳君子曰石碣純臣也惡州吁

而厚與焉大義滅親其是之謂乎

杜子從弑君之賊國之大逆不可不除故

曰大義滅親明小義則當兼子愛之林言石碣純直之臣也惡州吁弑君之賊以厚臣事州吁而併殺之仲君

臣之大義而滅父子之私親合於古語
大義滅親之說○惡烏路反與音預

○衛人逆公子

晉于邢冬十二月宣公即位

杜公子晉也邢音刑國名

書曰衛人立

晉衆也

林公子晉先出在邢衛人迎而立之

經癸亥五年春公矢魚于棠

杜書陳魚以示非禮也書棠譏遠地也今高平方與縣北

有武唐亭魯侯觀魚臺

○夏四月葬衛桓公○秋衛師入郕

杜將界師

衆但稱師此史之常也○郕音成國名

○九月考仲子之宮初獻六羽

杜成

仲子宮安其主而祭之惠公以仲子手文娶之欲以為夫人諸侯無二嫡蓋隱公成父之志為別立宮也公問羽數故書羽婦人無諡因姓以名宮林仲子桓母也隱將讓桓故以桓母為夫人諸侯無二嫡既以孟子為夫人故

為仲子別立廟以六

○邾人鄭人伐宋

杜邾主兵無故序鄭上螟傳螟

蟲食苗心者為災

○冬十有二月辛巳公子彊卒

杜大夫書卒

不書莖莖者臣子之事非公家所及○彊苦侯反

○宋人伐鄭圍長葛

林長葛鄭邑此

書圍之始也伐國不言圍邑僖之前書之杜潁川長社縣北有長葛城

傳五年春公將如棠觀魚者

林如往也隱公將往棠陳魚而觀之○魚本亦作漁

臧僖伯諫曰凡物不足以講大事

杜臧僖伯公子彊也僖諡也大事祀與戎

其材不足以備器用則君不舉焉

杜材謂皮革齒牙骨角毛羽也器用軍國

之器林總言田獵所取之物不足以講習祀戎之事凡物之材不足以供軍國之器用則人君不為是舉動焉

蓋君人之道以軍國祀戎為重以遊觀宴樂為輕

君將納民於軌物者也故講

事以度軌量謂之軌取材以章物采謂之物不軌不物

謂之亂政亂政亟行所以敗也

杜言器用衆物不入法度則為不軌不物亂敗

之所起林軌法也物采也可法謂之軌可采謂之物言君之所為將納民於可法可采之中故講習大事以準度軌法非苟然而講事取鳥獸之材以章明物采非苟然而取材不合度量不可采飾謂之亂國之政為人君而數行亂政此國家所以敗壞也

故春蒐夏苗秋獮

冬狩

杜蒐索擇取不孕者苗為苗除害也獮殺也以殺為名順秋氣也狩圍守也冬物畢成獲則取之無所

擇也○蒐所求反獮息淺反說文作獮

皆於農隙以講

事也

杜各隨時事之間林古者藏兵於農故四時之田皆於農事之間隙恐其妨農○隙去逆反

三

年而治兵入而振旅

杜雖四時講武猶復三年而大習出曰治兵始治其事入曰振旅治

兵禮畢整衆而還振整也旅衆也○振之慎反歸而飲至以數軍實

杜飲于廟以數車徒器

械及所獲也

昭文章明貴賤

林昭著也君大夫士車服旌旗各有文章田獵之制

貴者先殺所以明君大夫士庶人之貴賤

辨等列

林辨上下之等第行列坐作進退皆是也○辨如字

又方免反別也順少長

林出則少者在前起敵之義還則少者在後殺師之義所謂順也○少詩照反長丁

大反習威儀也

林有威而可畏謂之威有儀而可象謂之儀皆所以講習上下之威儀也

鳥獸

之肉不登於俎

杜俎祭宗廟器林飛禽走獸之肉不足登於俎以供祭祀○鳥獸之肉一本作

其肉俎
莊呂反

皮草齒牙骨角毛羽不登於器

杜謂以飾法度之器林有毛曰

皮去毛曰革小齒曰齒項上大齒曰牙翼上長毛曰羽不足升於法度之器以為采飾

則公不射

古之制也

林君不親射此古先之法制也○射食亦反

若夫山林川澤之實

器用之資阜隸之事官司之守非君所及也

林山林謂林木樵薪

之類川澤謂菱芡魚鱉之類所資取以為器用者杜士臣阜阜臣與與臣隸言取此雜猥之物以資器備是所親也○阜才早反公曰吾將略地焉

杜孫辭以畧地略總攝巡

行之名傳曰東略之不知西則否矣

遂往陳魚而觀之

杜陳設張也公大設捕魚之備而

觀僖伯稱疾不從書曰公矢魚于棠非禮也且言遠地

也

杜矢亦陳也。索實他竟。故曰遠地。○從才用反。

○曲沃莊伯以鄭人邢人伐翼

杜曲沃晉別封成師之邑在河東聞喜縣莊伯成師子也翼晉舊都在平陽絳邑縣東邢國在廣平襄國縣○

沃烏毒反

王使尹氏武氏助之翼侯奔隨

杜尹氏武氏皆周世族大夫也晉內

相攻伐不告亂故不書傳具其事為後晉事張本曲沃及翼本末見桓二年隨晉地

○夏莖衛桓

公衛亂是以緩

杜有州吁之亂十月乃莖傳明其非慢也

○四月鄭人侵衛

牧

杜牧衛邑經書夏四月莖衛桓公今傳直言夏而更以四月附鄭人侵衛牧者於下事宜得月以明事之

先後故不復備舉經文三年君氏卒其義亦同他皆放此○牧州牧之牧徐音目

以報東門之

役

杜東門役衛人以燕師伐鄭

杜南燕國今東郡燕縣○燕於賢反

鄭祭足

原繁洩駕以三軍軍其前

林軍其前攻其前也羅與盧戎兩軍之鄭子罕宵軍之皆

此義也。洩息列反。

使曼伯與子元潛軍軍其後燕人畏鄭三軍

而不虞制人

林制人鄭北制之人曼伯子元之軍也不虞不料度也杜制鄭邑今河南成皋縣也

一名虎牢。曼音萬。

六月鄭二公子以制人敗燕師于北制

杜二公子

曼伯子元也林因燕不虞制人遂用制人敗之

君子曰不備不虞不可以師

林

備禦不虞度不可以行師此傳言燕師不備以取敗

○曲沃叛王秋王命虢公伐

曲沃

林西虢君仕於王朝者也

而立哀侯于翼

杜春翼侯奔隨故立其子光

○衛之

亂也邠人侵衛故衛師入邠

杜邠國也東平剛父縣西南有邠鄉

○九月

考仲子之宮將萬焉

杜萬舞也

公問羽數於衆仲

杜問執羽人數

對

曰天子用八

杜八八六十四人

諸侯用六

杜六六三十八人

大夫四

杜四四十六人

士二

林二二四人士有功賜用樂

夫舞所以節八音而行八風

杜八音金

石絲竹匏土革木也八風八方之風也以八音之器播八方之風手之舞之足之蹈之節其制而聚其情林節八音者使人手舞足蹈節其禮制使不荒淫故曰舞者樂之主也以八音之器宣播八方之風次序人情阜財解慍使不蘊結也八音金鐘石磬絲琴瑟竹簫管土塤木祝敔匏笙草鼓也八方之風謂東方谷風東南清明風南方凱風西南涼風西方閭闔風故自八以下杜西北不周風北方廣莫風東北方融風天子得盡物數故以八公從之於是初獻六羽始用六為列諸侯則不敢用八

侑也

杜魯唯文王周公廟得用八而他公遂因仍僭而用之今隱公特立此婦人之廟詳問衆仲衆仲因

明大典故傳亦因言始用六侑其後季氏舞八侑於庭知惟在仲子廟用六○侑音逸

○宋人取

邾田邾人告於鄭曰請君釋憾於宋敝邑為道

杜釋四年再見

伐之恨○道音導本亦作導

鄭人以王師會之

杜王師不書不以告也林鄭莊尚為王卿

故得用周師

伐宋入其郛以報東門之役

杜郛郭也東門役在四年○郛旁夫

反下同

宋人使來告命

杜告命策書

公聞其入郛也將救之問

於使者曰師何及對曰未及國

杜忽公知而故問責窮辭○使所更反下同

公

怒乃止辭使者曰君命寡人同恤社稷之難

林怒使者言不遜君

謂殤公寡人自謂命猶令也命魯同憂恤宋國社稷之難○難乃旦反

今問諸使者曰師

未及國非寡人之所敢知也

杜為七年公伐邾傳

○冬十二月辛

巳臧僖伯卒

林即公子彊

公曰叔父有憾於寡人

杜諸侯稱同姓大夫長

曰伯父少曰叔父有恨恨諫觀魚不聽

寡人弗敢忘墓之加一等

杜加命服之等

○宋人伐鄭圍長葛以報入郕之役也

林入郕在今年秋

左傳杜林合注卷一

欽定四庫全書

左傳杜林合注卷二

明 王道焜

趙如源 同編

隱公二

經

甲子

六年春鄭人來渝平

林和而不盟曰平書渝平以志諸侯之合書及鄭平以志

諸侯之散諸侯合而天下始多故矣。渝羊朱反變也。

○夏五月辛酉公會齊侯

盟于艾

杜泰山牟縣東南有艾山林艾齊地此齊魯交好之始。艾五蓋反。

○秋七月

杜

無事而書首月具四時以成歲他皆微此

○冬宋人取長葛

杜秋取冬乃告也上有伐鄭圍

長葛長葛鄭邑可知故不言鄭也前年冬園不克而還今冬乘長葛無備而取之言易也

傳六年春鄭人來渝平更成也

杜渝變也公之為公子戰於狐壤為鄭所執逃歸

怨鄭鄭伐宋公欲救宋宋使者失辭公怒而止忿宋則欲厚鄭鄭因此而來故經書渝平傳曰更成

○翼

九宗五正頃父之子嘉父逆晉侯于隨

杜翼晉舊都也唐叔始封受懷

姓九宗職官五正逐世為晉強家五正五官之長九宗一姓為九族也頃父之子嘉父晉大夫○頃音傾納

諸鄂晉人謂之鄂侯

杜鄂晉別邑諸地名疑者皆言有以示不審闕者不復記其闕他皆

做此前年桓王立翼侯之子於翼故不得復入翼別居鄂林既有哀侯在翼遂以鄂侯別其號○鄂五各反

○夏盟于艾始平於齊也

杜春秋前魯與齊不平今乃棄惡結好故言始平於齊○

五月庚申鄭伯侵陳大獲

林大獲俘讖

往歲鄭伯請成于陳

成猶平也

陳侯不許五父諫曰親仁善鄰國之寶也君其許

鄭

杜五父陳公子佗林親近仁人善事鄰國國家之重寶

陳侯曰宋衛實難

杜可畏難

也口難乃旦反

鄭何能為

林宋衛大國實可畏難鄭小國何能為害

遂不許君子曰

善不可失惡不可長其陳桓公之謂乎長惡不悛從自

及也

林言為善之機不可失為惡之念不可長陳桓不許鄭成是失善機而長惡念長其惡而不改隨而

自及於禍也杜悛止也從隨也悛七全反

雖欲救之其將能乎商書曰惡

之易也如火之燎于原不可鄉邇

杜商書盤庚言惡易長如火焚原野不可

鄉近○燎力召反又音力吊
反鄉本又作嚮同許亮反

其猶可撲滅

杜言不可撲滅
○撲音卜反

周任有言曰

杜周任周大夫
○仕音士

為國家者見惡如農夫之務

去草焉芟夷蕪崇之絕其本根勿使能殖則善者信矣

林見惡非獨惡人凡惡念惡事皆是如農夫之治田園
必以去草為先務併草之本根而絕之勿使草能生殖
信仲同義惡者既屈則善者自伸矣杜芟刈也夷殺也
蕪積也崇聚也○去起呂反芟所斲反說文作發匹未
反云以足蹋夷草蕪紆
粉反信如字一音申 ○秋宋人取長葛 林經書冬而
傳書秋蓋秋

取冬乃 ○冬京師來告饑公為之請糴於宋衛齊鄭禮

也

杜告饑不以王命故傳言京師而不書於經也雖非
王命而公共以稱命已國不足旁請鄰國故曰禮也

傳見隱之賢林京大也師衆也天子之告必以衆大之辭言之五穀不熟曰饑周以饑告于魯也魯國不足政請糴於鄰國以供王命得救荒事君之禮。為于偽反糴直恩反。○鄭伯如周始朝桓

王也

杜桓王即位周鄭交惡至是乃朝故曰始

王不禮焉

林桓王不加禮貌於鄭

周桓

公言於王曰我周之東遷晉鄭焉依

杜周桓公周公黑肩也周采地扶風

雍縣東北有周城幽王為犬戎所殺平王東徙晉文侯鄭武公左右王室故曰晉鄭焉依林言平王東遷洛陽之時晉文侯鄭武公扞王於難此我周之所依賴者也。焉如字或於虔反善鄭以勸來者

猶懼不說况不禮焉鄭不來矣

林厚善撫鄭以勸獎諸侯來朝猶恐諸侯之不

至况不禮於鄭鄭伯不復來朝矣杜說至也為桓五年諸侯從王伐鄭傳。說其器反

經七年春王三月叔姬歸于紀

杜無傳叔姬伯姬之姊也至是歸者待年於

父母國不與嫡俱行改書

○滕侯卒

杜傳例曰不書名未同盟也

○

夏城中丘

杜城例在莊二十九年中丘在琅邪臨沂縣東北林魯邑此書城之始也

○齊侯

使其弟年來聘

杜諸聘皆使御執玉帛以相存問例在襄九年林此齊聘之始也

○秋

公伐邾

林此伐邾之始也

○冬天王使凡伯來聘

杜凡伯周卿士凡國伯爵

也汲郡於縣東南有凡城林周聘之始

戎伐凡伯于楚丘以歸

杜戎鳴鐘鼓以伐天

子之使見夷狄強競不書凡伯敗者單使無衆非戰陳也但言以歸非執也楚丘衡地在濟陰城武縣西南林

此戎惠之始也凡伯家父皆大雅之舊人

傳七年春滕侯卒不書名未同盟也凡諸侯同盟於是

稱名故薨則赴以名

杜盟以名告神故薨亦以名告同盟

告終稱嗣也以

繼好息民

杜告亡者之終稱嗣位之主嗣位之主當奉而不怠故曰繼好好同則和親故曰息民

好呼報反

謂之禮經

杜此言凡例乃周公所制禮經也十一

當書於策仲尼修春秋皆承策為經丘明之傳博采衆記故始開凡例特顯此二句他皆倣此林經常也謂之

常禮

○夏城中丘書不時也

林夏非城築之時妨農事也

○齊侯使夷

仲年來聘結父之盟也

林父盟在六年林即弟年

○秋宋及鄭平七

月庚申盟于宿公伐邾為宋討也

杜公距宋而更與鄭平欲以鄭為援今鄭復

與宋盟故懼而伐邾欲以求
宋故曰為宋討○為于偽反
○初戎朝于周發幣于公

卿凡伯弗賓

杜朝而發幣於公卿如今計獻詣公府卿寺林如今奉使而私覲之禮

冬王

使凡伯來聘還戎伐之于楚立以歸
杜傳言凡伯所以見伐
○陳

及鄭平

杜六年鄭侵陳大獲今乃平

十二月陳五父如鄭涖盟
杜涖也
壬

申及鄭伯盟歆如忘

杜志不在于歆血也○歆色洽反忘亡亮反服虔云如而也
洩伯

曰五父必不免不賴盟矣

林言五父必不免於禍不藉盟歆以為重林洩伯鄭洩駕

○洩息列反

鄭良佐如陳涖盟

杜良佐鄭大夫

辛巳及陳侯盟亦知

陳之將亂也

杜入其國觀其政治故總言之也皆為桓五年六年陳亂蔡人殺陳佗傳
○鄭

公子忽在王所故陳侯請妻之

林忽鄭莊公子三年為質於周以忽有王寵故

請以女妻之
○妻七計反

鄭伯許之乃成昏

杜為鄭忽失齊昏援以至出奔傳

經丙八年春宋公衛侯遇于垂

杜垂衛地濟陰句陽縣東北有垂亭林特相遇

不書書宋衛將以為參盟也

○三月鄭伯使宛來歸祊

杜宛鄭大夫不書氏未賜

族祊鄭祀泰山之邑在琅邪費縣東南○宛於阮反祊必彭反

庚寅我入祊

杜桓元年乃卒易祊

田知此入祊未肯受而有之

○夏六月己亥蔡侯考父卒

杜無傳襄六年傳曰

杞桓公卒始赴以名同盟故也諸侯同盟稱名者非唯見在位二君也嘗與其父同盟則亦以名赴其子亦所

以繼好也蔡未與隱盟蓋春秋前與惠公盟故赴以名林宣公卒桓侯封人立

○辛亥宿男卒

杜無傳元年宋魯大夫盟于宿宿與盟也晉荀偃稱齊晉君名然後自稱名知雖大夫出盟亦當先稱已君之名以啓神明故薨皆從身盟之例當告以名也傳例曰赴以名則亦書之不然則否辟不敏也今宿赴不以名故亦不書名諸例或發於始事或發於後者因宜有所異同亦或丘明所得記注本末不能皆備故林元年同盟不赴

○秋七月庚午宋公齊侯衛侯盟于瓦屋

杜齊侯尊宋使主會故宋公序齊上瓦屋周地林此參盟之始也有參盟然後有主盟

○八月葬

蔡宣公

杜無傳三月而葬連

○九月辛卯公及莒人盟于浮來

杜莒

人微者不嫌敵公侯故直稱公例在僖二十九年浮來紀邑東莞縣北有邳鄉邳鄉西有公來山號曰邳來間杜此好莒之始吾君

○螟杜無傳為災

○冬十有二月無駭卒

特會外大夫始此

杜公不與小斂故不書日
卒而後賜族故不書氏

傳八年春齊侯將平宋衛

杜平宋衛於鄭

有會期宋公以幣請

於衛請先相見

林宋敬齊命故以幣帛將意請命于衛先與衛侯相見

衛侯許之

故遇于犬丘

杜犬丘垂也地有兩名

○鄭伯請釋泰山之祀而祀

周公以泰山之祊易許田三月鄭伯使宛來歸祊不祀

泰山也

杜成王營王城有遷都之志故賜周公許田以為魯國朝宿之邑後世因而立周公別廟焉鄭

桓公周宣王之母弟封鄭有助祭泰山湯沐之邑在祊鄭以天子不能復巡守故欲以祊易許田各從本國所

近之宜恐魯以周公別廟為疑故云已廢泰山之祀而欲為魯祀周公澠辭以有求也許田近許之田林此鄭

莊公請于魯欲舍周祭泰山之從祀而為魯祀周公之別廟訪鄭人從祀泰山之湯沐邑許田魯人朝宿之邑訪近魯許近鄭歸訪於魯不從祀於泰山也○泰如字東嶽○夏號公忌父始作卿

士于周

杜周人于此遂畀之政

○四月甲辰鄭公子忽如陳逆婦媯

辛亥以媯氏歸甲寅入于鄭陳鍼子送女先配而後祖

鍼子曰是不為夫婦誣其祖矣非禮也何以能育

杜鍼子陳

大夫禮逆婦必先告祖廟而後行故楚公子圍稱告莊共之廟鄭忽先逆婦而後告廟故曰先配而後祖林鍼子見其事而譏之曰是不能終為夫婦誣罔其祖矣非娶婦之禮也娶妻本為繼宗守祀計今誣其祖則不為祖宗所佑何以能生育乎○齊人卒平宋衛于鄭

林春將平

○鍼其廉反誣亡符反

宋衛而未結故曰秋會于溫盟于瓦屋以釋東門之役

辛平宋衛于鄭

禮也杜會溫不書不以告也定國息民故曰禮也平宋衛二國忿鄭之謀鄭不與盟故不書林以解四年

國鄭東門之憾○八月丙戌鄭伯以齊人朝王禮也杜言鄭伯不以號公

得政而背王故禮之齊稱人畧從國辭上有七月庚午下有九月辛卯則八月不得有丙戌林鄭莊因齊僖在周地故以齊朝王得事上之禮○公及莒人盟于浮來以成紀好也杜

年紀莒盟于密為魯故今公尋之故曰以成紀好○好呼報反○冬齊侯使來告成三

國杜齊侯冬來告稱秋和三國公使衆仲對曰君釋三國之圖以鳩

其民君之惠也寡君聞命矣敢不承受君之明德林言齊僖

解釋三國相國之患使三國不相攻戰以安集其民人
安諸侯之恩惠寡若謂我公間齊之成命矣周易乘承
之義在上曰乘在下曰承此言承受蓋謙辭敢
不順下風而承受齊君之明德也杜鳩集也 ○無駭

卒羽父請謚與族公問族於衆仲

林無駭魯大夫羽父公子翬也謚死者易

名之稱號也族氏也羽父為無駭請謚及為其子請衆
族氏於君也謚不必問故但問何以為無駭之族氏

仲對曰天子建德

杜立有德以為諸侯

因生以賜姓

杜因其所由生以賜姓謂若

舜由鳩納故陳為鳩姓

昨之土而命之氏

林報之以土地因其所封地為之族氏若胡公

封於陳命曰陳氏也○昨才故反

諸侯以字

杜諸侯位卑不得賜姓故其臣因氏其王父字為

謚因以為族

杜或使即先人之謚稱以為族

官有世功則有官族邑亦

如之

杜謂取其舊官舊邑之稱以為族皆稟之時君林謂世世居其官而有功者則以其官為族若晉之

士氏中行氏之類或以所封之邑若趙氏韓氏魏氏之類

公命以字為展氏

杜諸侯之子稱

公子公子之子稱公孫公子之子以王父字為氏無駭公子展之孫故為展氏

經

丁卯

九年春天王使南季來聘

杜無傳南季天子大夫也南氏季字也

三月癸酉大雨震電庚辰大雨雪

杜三月今正月○電徒練反雨于付反傳同

○挾卒

杜無傳挾魯大夫未賜族○挾音協

○夏城郎○秋七月○冬公

會齊侯于防

杜防魯地在琅邪華縣東南

傳九年春王三月癸酉大雨霖以震書始也

杜書癸酉始始雨日

林經書大雨震電傳言霖以震見自癸酉日始以後皆雨霖以震○霖音林爾雅云以雨謂之淫淫雨謂之霖

庚辰大雨雪亦如之書時失也

杜夏之正月微陽始出未可震電既震電又不

當大雨雪故皆為時失林霖震電而又雨雪所以為異蓋自庚辰以後亦連綿雨雪不止也

凡雨自

三日以往為霖

杜此解經書霖也而經無霖字經誤

平地尺為大雪

林言凡春

秋書雨書霖書大雪之義

○夏城郎書不時也

林凡土功水昏正而栽木營室星也小雪

十月中氣昏見正中今書夏故曰不時

○宋公不王

杜不共王職

鄭伯為王左

卿士以王命討之伐宋

林時周人雖昇號公政鄭莊公猶為左卿士也故得奉王命討

其不共王職

宋以入郛之役怨公不告命

杜入郛在五年公以七年伐郛欲以

說宋而宋猶不和也林以隱公五年辭宋公怒絕宋使

使不救宋故怨魯不告魯以受伐之命

林隱公怒宋絕其往來○秋鄭人以王命來告伐宋

之使也○使所吏反○冬公會齊侯于防謀伐宋也

使致王命也伐宋未得志故復更告之○北戎侵鄭鄭伯禦之患

秋之初齊鄭一黨也故鄭告○北戎侵鄭鄭伯禦之患

戎師曰彼徒我車林言北戎以別戎之雜處中國者也

車懼其侵軼我也林懼車戰難於進退為步兵之所侵

公子突曰使勇而無剛者嘗寇而速去之杜公子突鄭

也勇則能往無剛不恥退林勇而輕進可以君為三覆

試敵之堅銳無剛易退可以致敵之追躡

左傳杜林合注

九

以待之

杜覆伏兵也林使鄭君為伏兵三處以待戎之追躡○覆扶又反下同

戎輕而不

整貪而無親勝不相讓敗不相救先者見獲必務進進

而遇覆必速奔後者不救則無繼矣乃可以逞

林言戎兵輕易

而不整其行伍貪利而不相親附惟貪利故得勝不肯相讓而獨進不相親附故遇敗不肯相救而先奔在前者見有所獲必務先進者遇伏兵必速奔走而歸後者見先者敗走必不相救則戎兵無後繼矣乃可以快志於戎杜逞解也○

從之戎人之前遇覆者奔祝肅

逐之喪戎師前後擊之盡殪

林祝肅鄭大夫師勇而無則者先犯戎而速奔至後

伏兵起戎還走祝肅反逐之伏兵衝擊戎師之中第一伏擊其前祝肅與第二伏擊其後并第三伏擊其中戎

前後中三處受敵故曰表戎師前後擊之戎人之前者盡死杜壇死也○臆乃甘反又上甘反表丁仲反又音

忠壇於戎師大奔杜後駐軍不復繼也林戎人計反之在後駐軍不救者皆大奔十一月

甲寅鄭人大敗戎師杜此皆春秋時事雖經無正文所謂必廣記而備言之將令學者原始

要終尋其枝葉究其所窮他皆放此

經戊辰十年春王二月公會齊侯鄭伯于中丘杜傳言正月

釋例推經傳日月癸丑是正○夏鞏帥師會齊人鄭人月二十六日知經二月誤

伐宋杜公子翬不待公命而貪會二國之君疾其專進故去氏齊鄭以公不至故亦更使微者從之伐宋

不言及明鞏專行非鄭之謀也及例在宣七年○六月壬戌公敗宋師于菅杜

鄭後期故公獨敗宋師書敗宋未陳也辛未取郕辛巳

取防

杜鄭後至得郕防二邑歸功于魯故書取明不用

南有西防域林郕防宋二邑鄭入之以歸于我也鄭取

郕防歸于我不書鄭譏不在晉也○秋宋人衛人入鄭宋人

蔡人衛人伐戴鄭伯伐取之

杜三國伐戴鄭伯因其不和伐而取之書伐用師徒

也書取克之易也戴國今陳留外黃○冬十月壬午齊

人鄭人入郕

傳十年春王正月公會齊侯鄭伯于中丘癸丑盟于鄆

為師期

杜尋九年會于防謀伐宋也公既會而盟盟不書非後也蓋公還告會而不告盟鄭魯地林九

年會于防謀伐宋故今會盟為出師之期日

○夏五月羽父先會齊侯鄭伯

伐宋

杜言先會明非公本期釋鞏之去族

○六月戊申公會齊侯鄭伯于

老桃

杜會不書不告於廟也老桃宋地六月無戊申戊申五月二十三日日誤

壬戌公敗宋

師于管庚午鄭師入郕辛未歸于我庚辰鄭師入防辛

巳歸于我

杜壬戌六月七日庚午十五日庚辰二十五日鄭伯後期而公獨敗宋師故鄭頻獨進兵

以入師防入而不有命魯取之推公上爵讓以自替不有其實故經但書魯取以成鄭志善之也君子

謂鄭莊公於是乎可謂正矣以王命討不庭

杜言鄭莊公以王命

討宋之不王其曰不庭者下之事上皆
成禮於庭中猶言不趨走於王庭也
不貪其土以勞

王爵正之體也

杜勞者叙其勤以答之諸侯相朝逆之以饗饋謂之郊勞魯侯爵尊鄭伯爵卑

故言以勞王爵祿不貪節防土地之利以答勤勞之魯行師之正有體有用不貪者正之體也口勞力報反

○蔡人衛人成師人不會王命

林三國不會伐宋蓋九年鄭以王命來告伐宋想皆

告于諸侯故曰不會王命○秋七月庚寅鄭師入郊猶在郊

杜鄭師還駐兵

於遠
宋人衛人入鄭

杜宋衛奇兵東廬入鄭

蔡人從之伐戴

杜從宋衛

也
八月壬戌鄭伯圍戴癸亥克之取三師焉

杜三國之軍在

戴故鄭伯合圍之師者軍旅之通稱林得雋曰克取宋衛蔡三師取言易也

宋衛既入鄭而

以伐戴召蔡人蔡人怒故不和而敗

林言蔡人不與入鄭伐戴乃召之蔡

人怒宋衛不同其入鄭之功不與宋衛和以至於敗也杜言鄭取之易也

○九月戊寅鄭伯

入宋

杜報入鄭也九月無戌寅戌寅八月二十四日

○冬齊人鄭人入郕討違

王命也

林討郕拒違王命不會伐宋

經已

十有一年春滕侯薛侯來朝

杜諸侯相朝例在文十五年林此諸侯朝

魯之始亦旅見之始薛息列反

○夏公會鄭伯于時來

杜時來邾也莒陽縣東有

釐城鄭地也

○秋七月壬午公及齊侯鄭伯入許

杜與謀日及還使許

叔居之故不言滅也許潁川許昌縣

○冬十有一月壬辰公薨

杜實弑書薨又不地者

史策所

諱也

傳十一年春滕侯薛侯來朝爭長

杜薛魯國薛縣林滕薛同為侯爵故爭為

長○長薛侯曰我先封

杜薛祖奚仲夏所封在周之前

滕侯曰我周之

卜正也

杜卜正卜官之長

薛庶姓也我不可以後之

杜庶姓非周之同姓林薛

任姓滕姬姓故指薛為庶姓同姓之親不可以後於庶姓

公使羽父請於薛侯曰君

與滕君辱在寡人周諺有之曰山有木工則度之賓有

禮主則擇之

林欲薛讓滕為長故獨使人請於薛侯周之俗語有之山林有木工師則度其材之

小大而用之賓客有禮主人則擇其序之

周之宗盟異

尊卑而行之○訪音彥俗言也度大洛反

姓為俊

杜盟載書皆先同姓例在定四年

寡人若朝于薛不敢與諸任

齒

杜言周家宗室有盟誓之事皆先同姓而後異姓設若我公來朝薛國我姬姓諸侯不敢與任姓諸侯並

列杜齒列也○任音士

君若辱貺寡人則願以滕君為請

林謙言薛若辱

加貺賜於魯君則願請以滕君為長

薛侯許之乃長滕侯○夏公會鄭伯

于邾謀伐許也鄭伯將伐許五月甲辰授兵于大宮

林邾

即經書時來之地魯鄭共謀伐許授兵賦車馬也大宮鄭祖廟也蓋授兵車於祖廟也凡出師必告于祖廟而

奉遷廟之主以行○大音泰

公孫閱與穎考叔爭車

杜公孫閱鄭大夫林爭車者爭

所賦之車。關於葛反

穎考叔挾輶以走

杜輶車輶也林授車之時未有馬故以手挾輶

而走○扶音

子都拔棘以逐之

杜子都公孫闕棘戟也

及大逵弗

及子都怒

杜逵道方九軌也杜蓋拔戟以逐穎考叔○達求龜反爾雅云九達謂之達杜云道方九

軌此依

考工記○秋七月公會齊侯鄭伯伐許庚辰傅于許

林

附也三師附于許

穎考叔取鄭伯之旗蝥弧以先登

林

考叔取鄭莊公之旗名蝥弧者率先鄭

子都自下射之

兵以登許國之城○蝥弧亡侯反弧音朔

顯○杜顯隊而死瑕叔盈又以蝥弧登

林瑕叔盈鄭大夫考叔既顯越而下

故瑕叔盈又

周麾而呼曰君登矣

杜周麾也麾招也○

呼火

鄭師畢登

林鄭師見君之旗信

壬午遂入許許莊

故反

鄭師畢登

林鄭師見君之旗信

壬午遂入許許莊

公奔衛

杜奔不書兵亂過逃未知所在

齊侯以許讓公

林既入許以其土地讓與魯

公曰君謂許不共

杜不共職貢○共音恭本亦作供音同

故從君討之許

既伏其罪矣雖君有命寡人弗敢與聞乃與鄭人鄭伯

使許大夫百里奉許叔以居許東偏

林許君出奔是伏不共之罪雖齊有

以許與魯之命魯不敢聞此命而輒受齊魯既不受許乃以與鄭鄭莊公見齊魯相遜亦不敢自有許國乃使許大夫名百里者奉許莊公之弟許叔居許東偏以見不全得國也杜東偏東鄙也○與音預曰天禍

許國鬼神實不逞于許君而假手于我寡人

林言上天降禍於許

國鬼神實怒許君而不得自逞其志而降之罰借寡人手於我以討許罪杜借手於我寡德之人以討許寡人

唯是一二父兄不能共億

杜父兄同姓羣臣共給億安也林不能共給而億安之

億於力反

其敢以許自為功乎寡人有弟不能和協而使餽

其口於四方

杜弟共叔段也餽幣也段出奔在元年林不能和睦而叶比之而使叔段寄食於四

方之國。餽音胡說文云寄食

其況能久有許乎吾子其奉許叔以撫

柔此民也吾將使獲也佐吾子

林吾子謂百里其奉許莊公之弟以撫綏柔順

此許東偏之民也我將使鄭大夫公孫獲佐助百里以治許

若寡人得沒于地

杜以壽終

天其以禮悔禍于許

杜言天加禮於許而悔禍之

無寧茲許公復奉

其社稷

杜無寧寧也茲此也林言寧止此許叔居許東偏許莊公復還國而奉其社稷之祭祀。復扶

人反又音服

唯我鄭國之有請謁焉如舊昏媾

杜諱告也婦之父曰昏重

昏曰媾林如舊日姻媾之親○媾古豆反

其能降以相從也

杜降降心也林降心以從鄭之

請無滋他族實偏處此以與我鄭國爭此土也吾子孫

其覆亡之不暇而況能禮祀許乎

林無生他姓族類之心處此許地以偏害

鄭以與我鄭爭此許國之土地若他族處此相傷害則我鄭國之子孫救覆亡之不暇而況能禮祀許之山川乎杜潔齊以享謂之禮祀謂許山川之祀○覆芳服反暇行嫁反禮音因寡人之使吾子處

此不唯許國之為亦聊以固吾圉也

林言我之使許叔處許東偏之地不

惟為許國之社稷亦賴汝以固我之邊陲也杜圉邊陲也○為于偽反圉魚呂反

乃使公孫獲

處許西偏曰凡而器用財賄無寘於許我死乃亟去之

吾先君新邑於此

林言汝之器用財物皆賄無寘於許西偏之地鄭自桓公受封至莊公纔

二世故曰新邑於鄭杜此今河南新鄭舊鄭在京兆賄呼罪反字林音悔寘之豉反置也亟紀力反急也○

王室而既卑矣周之子孫日失其序

林鄭與周同姓諸姬之子孫日失其

次序夫許大岳之肩也

杜大岳神農之後克四岳也肩繼也○大音泰

天而既厭

周德矣吾其能與許爭乎君子謂鄭莊公於是乎有禮

林王室卑子孫失序則天棄周德可知我鄭國豈能以天之所厭而與許爭為難長哉此言鄭莊公得伐叛討

貳存亡繼絕之禮○厭於艷反

禮經國家定社稷序民人利後嗣者也

許無刑而伐之服而舍之

杜刑法也

度德而處之量力而行

之相時而動無累後人

林言禮之用經理其國家安定其社稷教民長幼尊卑之序為

後嗣萬世無疆之利者也許國家無刑法而伐之許服其罪而舍其國度許德之厚薄而處之度鄭力之強弱而行之聊以固吾圉是相時而動我死乃亟去之是無累後人也○度待洛反量音良下同相息亮反累考偽

反

可謂知禮矣○鄭伯使卒出殯行出犬難以詛射穎

考叔者

杜百人為卒二十五人為行行亦卒之行列疾射穎考叔者故令卒及行間皆詛之○卒尊忽

反殯音加豬別名行尸剛反詛側慮反

君子謂鄭莊公失政刑矣政以治

民刑以正邪既無德政又無威刑是以及邪

杜大臣不能

用刑於邪人林謂失政正刑邪之道政者正也所以治
民利者制也所以正邪既無德以美其政又無威以用
其利臣下不懷德畏威是以及邪而詛之將何益矣

林邪

不能治而假詛祝將○王取鄆劉杜二邑在河南縣西南有鄆聚西北

有劉亭○為邾之田于鄭杜為邾鄭二邑林周桓王取鄭四邑之田為尤委反邾

音而與鄭人蘇忿生之田杜蘇忿生周武王司寇蘇公也林蓋蘇公受此田以為采

邑蘇氏叛王桓王不能有其田杜今溫杜今原杜在沁水縣西絺杜在

野王縣西南樊杜一名陽樊野王縣西隰郕杜在懷縣西南

詳立反邾杜在修武縣北向杜軹縣西有地名盟

尚征反杜在修武縣北向杜軹縣西有地名盟

杜今盟津州杜今陘杜關○陘音刑○杜在修武縣北懷杜今

凡十三邑皆蘇忿生之田櫟君子是以知桓王之失鄭

也恕而行之德之則也禮之經也已弗能有而以與人

人之不至不亦宜乎林已所不欲勿使於人今王以已

目有之四邑君子是以知桓王失鄭莊之心也推已及

人之謂恕恕者德之法則也禮之經紀也十二邑非王

所有而與鄭人使自取之人謂鄭也宜鄭之○鄭息有

違言杜以言語息侯伐鄭鄭伯與戰于竟息師大敗而

還林與息戰于鄭之境蓋逆息師而戰杜息國君子是

以知息之將亡也

林師敗亡國之兆也為莊公十四年楚滅息

不度德

杜鄭

度侍洛反

不量力

杜息

不親親

杜鄭息同姓之國

不徵辭不察有

罪

杜言語相恨當明微其辭以審曲直不宜輕闕

犯五不韙而以伐人其喪師

也不亦宜乎

杜韙是也林五者不是息皆犯之而興師以伐鄭其取敗也宜其然也。韙韋鬼反喪息

浪反

○冬十月鄭伯以虢師伐宋壬戌大敗宋師以報其

入鄭也

杜入鄭在十年

宋不告命故不書凡諸侯有命告則書

不然則否

杜命者國之大事政令也承其告辭史乃書之於策若所傳聞行言非將君命則記在簡

牘而已不得記於典策此蓋周禮之舊制師出臧否亦如之

杜臧否謂善惡得失也滅而告

敗勝而告克此皆互言不須兩
告乃書○否音鄙又方九反
雖及滅國滅不告敗勝

不告克不書于策○羽父請殺桓公將以求大宰杜大宰官

名林欲為隱殺桓以求
大宰之官○大音泰
公曰為其少故也吾將授之矣

林為桓公尚少故攝魯國吾將以君
位授桓公矣○為于偽反少詩照反
使營菟裘吾將老

焉杜菟裘魯邑在泰山梁父縣南不欲復居
魯朝政別營外邑○菟兔都反裘音求
羽父懼反

諧公于桓公而請弑之
林以隱公不從而懼禍及已反
諧隱公於桓公謂隱將殺桓請

為桓弑隱以下殺
上曰弑○諧剛鴆反
公之為公子也與鄭人戰于狐壤止

焉杜內諱獲故言
止狐壤鄭地
鄭人因諸尹氏杜尹氏
賂尹氏而禱

于其主鍾巫

林隱公行賄賂於尹氏祈禱於尹氏所主祭鍾巫之神。賂音路。禱丁老反。或多報

反巫亡夫反

遂與尹氏歸而立其主

林遂與尹氏俱逃歸魯國而立鍾巫之廟於魯

十一月公祭鍾巫齊于社圃

杜社圃園名。圃布古反

館于窩氏

杜館

舍也。窩氏魯大夫。窩于婁反

壬辰羽父使賊弑公于窩氏立桓公而

討窩氏有死者

杜欲以殺君之罪如窩氏而復不能正法誅之傳言進退無據

不書葬

不成喪也

桓弑隱墓立故喪禮不成

左傳杜林合注卷二